

DARI IKHWAN KEPADA IKHWAN

Agama Islam dalam Malaya Merdeka

Agama Islam telah diisytiharkan menjadi agama rasmi Tanah Melayu yang akan mencapai kemerdekaan dalam bulan Ogos 1957 yang akan datang. Ketetapan ini memang sudah semestinya dan mestilah pula dijalankan dengan sepenuhnya, jangan hanya pada namanya seperti yang sedang berjalan sekarang ini.

Demikian kata Ustaz Syed Abu Bakar al-Attas Guru Besar Madrasah al-Karimah, Sungai Buloh, Alor Gajah, Melaka. Seterusnya beliau menulis:

Syukur kepada Allah ‘Azzawajalla yang telah menunjukkan pihak majalah “Qalam” menganjurkan persahabatan “Ikhwan” kepada sekalian umat Islam menurut bagaimana perintah Allah Ta’ala di dalam al-Qur’ān al-Karīm “*inna al-mu’minū ikhwān*” (adalah orang-orang mukmin itu bersaudara). Sebagai guru agama, saya menyeru saudara-saudara *Ikhwān al-Muslimīn* terutama sekali anggota “Ikhwan” supaya menurut bagaimana perintah Allah Ta’ala dan Rasul-Nya Muhammad (SAW). Ingatlah sabda Junjungan: “*innī tārikū fikum mā an tamasaktum bihi lan tadhuLLū kitāballah wa sunnatī*” (Aku meninggalkan pada kamu-umat Islam-selama kamu memegangnya tidak kamu sesat iaitu *al-Qur’ān al-Karīm* dan *al-Hādīth al-Shārif*). Kita mesti faham bagaimana umat Islam zaman Rasulullah dan sahabat-sahabatnya memegang dan beramal dengan apa-apa yang diperintah oleh Allah dan Rasul-Nya dalam segala perkara keduniaan dan akhirat, dengan sebabnya mereka jaya dan maju di dalam segala lapangan sehingga mereka telah diakui oleh Allah Ta’ala dan Rasul-Nya suatu umat yang berharga dunia dan akhirat. Alhamdulillah umat Islam telah maju sehingga tersiarlah agama Islam

di seluruh dunia daripada puak yang kecil di Mekah dan di Madinah sehingga masa ini berjumlah 500 juta muslim dan muslimah. Mereka telah menyebarkan tamadun Islam di benua Eropah sehingga pendita-pendita barat mengakui jika tidak kerana tamadun Islam nescaya tamadun barat yang ada sekarang ini tidak akan dapat merasai nikmat-nikmatnya. Malangnya kemudian daripada Islam baik di Tanah Arab atau di lain negeri terutama di Malaya dan di Indonesia tidak mengikut ajaran al-Qur’ān dan al-Hādīth di dalam segala lapangan sehingga akhirnya jatuhlah kita di dalam penjajahan barat.

Alhamdulillah, dengan kurnia Allah datanglah perubahan baharu iaitu kemerdekaan tanah air pada tahun hadapan. Sekarang timbul suatu soal, soal agama Islam akan jadi agama rasmi di dalam Malaya merdeka, adakah hukum-hukum agama akan dijalankan bagaimana kehendak Allah Ta’ala seratus peratus atau seperti keadaannya dalam masa penjajah iaitu hanya pada nama sahaja. Kita tunggu tahun hadapan, mudah-mudahan tercapailah ajaran Allah Ta’ala dan Rasul-Nya.